

1042



1. Strauß / Jac. / verdient alle in
von ... Eisenach, 1523.
2. Der Schlüssel Davids, 1523.
3. Bucer p. Mart. / von den ...
an ... Naestmaßl ...
Straßburg 1524.
4. Hedion f. Cyp. / ...
von ... Straßburg
1524.
5. Carlstadt / Andr. / vom Sacrament
... Christi
1523.



129 #

Der spruch s. Pau= li .j. Timoth. ij.

Sie wird selig durch Kinder zeugen / so sie blei-
bet im glauben / in der liebe vnd in der heiliz-
gung sampt der zucht. Ausgelegt durch.

D. Casper Creutziger.

Gantz tröstlich vnd nützlich allen Christ-
lichen Tugentsamen frawen zulesen
vnd wissen.

gedruckt zu Berlin bey Hans
Weiss. M. D. C. XXI.



[Faint, illegible text, likely bleed-through from the reverse side of the page. The text is arranged in several lines and is significantly faded.]



Allen Christlichen Tugentsamen

Frauen/wünscht M. Joachim Fried-
reich Gnad vnd Fried Gottes im
Herrn Christo.

Es hat der Erwürdiger vnd Hochgelerter
Herr D. Casper Creutziger newlich eine Aus-
legung vber die ersten Epistel an Timotheon la-
ssen ausgehen/Daraus habe ich verdenkschet/
was er hat geschrieben vber den Spruch von
den Weibern/das sie durch Kinder zeugen selig
werden/so sie im glauben bleiben &c. Allen
Christlichen weibern zu gute vnd zu trost. Denn
darin alles was einer frauen zu wissen nötig/
Kurtzlich vnd artig verfasst ist/vnd neben vie-
len schönen nützlichen notwendigen lehren/Es
kan auch ein Christlichs weib grossen trost aus
den wenig Worten haben so sie die selbigē grunt-
lich verstehet vñ sie sich wol einbildet. Gott wol-
te Euch sein gnade geben /das jr diesen
Spruch wol muget fassen/zu hertzen
nemen/vnd Euch in ewerm
gantzen leben darnach
richten vnd schi-
cken/ Amen.

A ij

Der Spruch

Der Spruch S. Pauli
i. Timoth. ij.

Sie wird selig durch kinder
zeugen / so sie bleibt im glau-
ben / vnd in der liebe / vnd in der
heiligung sampt der zucht.

Diese lehre vnd Spruch des Heiligen
Apostels Pauli ist eine schöne / nütz-
lich / tröstliche lehre vnd vnterricht / denn
er darin alles kurtzlich verfasst vnd angezeigt
hat / was zu eines weibes heil vnd wolfart ge-
reicht. Item / Es hat aber der liebe Apostel
Paulus nicht on grosse wichtige vrsach vnd be-
dencken solche lehre vnd vermanung gethan /
Denn dieweil ein weibesbilde von natur sch-
wach vnd nicht gantz starcks gemüts ist / so kan
es leichtlich wohin beredet vnd auff abergläu-
big wahn gefuret werden / welcher vrsach hal-
ben er auch verboten hat / das man inen nicht
gestatten sol öffentlich zuleren / zeigt derhalben
hie an vnd leret / welches da sind die rechten
Gottes dienste / vnd die rechten wercke eines
Christlichen fromen weibes / Vnd ist warlich
hoch von nöten / das sie die selbigen stücke so S.
Paulus hie leret wol vnd fleissig mercken / vnd
gründlich verstehen lernen / das sie nicht von
diesen rechten nützlichen Christlichen wercken /
auff

auff andere nerrische vnnütze vnd vergebliche/
durch aberglauben/falschen wahn/vnd heuch-
ley verfurt werden.

Vnd erstlich müssen wir den text recht
verstehen lernen/ Der Griechische text hat also.
Sie wird selig werden durch kinder zeugen/so sie
bleiben im glauben / das wortlin bleiben / ist
hie zuuerstehen nicht von den kindern/sondern
von den weibern / Denn es ist von weibern in
gemein geredet.

Es haben etliche das wort (bleiben) auff
die kinder gezogen/ vnd also gedeutet / das ein
Mutter nicht könne selig werden / wo nicht die
kinder glaubeten / Aber der Griechische Text
stimmet nicht mit dieser meinung vnd deutung/
Auch ist wider andere klare Schrift / das ein
Mutter nicht solt selig werden / so die kindere
nicht glaubten/ Sagt doch Christus/ Der nicht
verleßt Vater vnd Mutter / Weib vnd kindere
vmb meinet willen etc. Derhalben ist solche
deutung vnd meinung vnrecht/vnd gantz zuuer-
werffen.

Zum andern ist zu mercken / das der gantz
Spruch aneinander henge / das Paulus nicht
schlecht sagt / Sie wird selig durch kinder zeu-
gen/sondern hengt daran vnd sagt darzu/so sie
bleibt im glauben/ liebe/ heiligung vnd zucht/
Denn wie die Schrift an andern ortern leret/
das zur seligkeit der glaube von nöten sey/vnd
das ein gehorsam gegen das Gesetz Gottes vnd
rechte wercke eines iglichen in seinem beruff vnd

A ij stande

stande folgen müsse/Wie Paulus zeuget da er
sagt. ij. Corint. v. So müssen wir bekleidet vnd
nicht blos erfunden werden. Item/Irret nicht
solche werden das Himelreich nicht besitzen &c.
Also foddert er auch hie den glauben in einem
weibe/vnd setzet dazu die wercke jres beruffes
vnd standes/nemlich/ Kinder zeugen vnd die an-
dern tugenden. Das ist hie nu wol zu mercken/
das er den glauben nicht aussen lest / da er die
wercke jrer vocation oder beruffes preisset/Auff
das wir wissen / das wercke on den glauben/
nicht Gott zu loben noch zu preisen sind.

Es mocht aber jemandts hie ein einrede
thun/ vnd fragen/ weil S. Paul den glauben/
vnd die wercke zusammen fasset / ob er denn meiz-
ne/das man auch vmb der werck willen vergez-
bung der sunde vnd das ewige leben erlange/
Darauff ist leichtlich zu antworten vnd in der
kürtze also.

Die gerechtigkeit der wercke / oder rechte gute
Christliche werck/ sind von nöten/vnd müssen
aus dem glauben folgen vnd fließen / Aber die
ursach/der grund/ vnd das fundament der ver-
gebung vnser sunde / vnd des ewigen lebens/sol
anders wo hin gezogen vnd gelegt werden/
nemlich auff die zusage im Herrn Christo/wel-
che zusage alleine mit dem glauben kan gefasset
werden. Darauff mus der glaube allein fussen
vnd grunden/Vnd nicht auff die würdigkeit des
folgenden gehorsams/ oder der guten wercke/so
hernach

Hernach folgen müssen / Sonst würde die selbige
zusage vngewis. Nichts destweniger aber ist
der folgende gehorsam von nöten / das aus einem
glauben gute wercke fließen müssen. Dieser ist
der richtigst vnd gründlichst bericht / vnd eine
nötig lehr allen gewissen. Weil nu Paulus
des glaubens hie gedencet / so zeigt er damit
an vnd leret / Erstlich / das ein weib vergebung
der funde habe / vnd ein erbe des ewigen lebens
werde / allein durchs verdienst Christi / so sie der
zusage vom herrn Christo gleubet. Weil er aber
die andern tugenden vnd wercke dazu thut / da-
mit zeigt er an / das ein gehorsam gegen Gottes
gebote oder rechte gute wercke von nöten sein /
vnd hernach folgen müssen / wie er denn an an-
dern ortern leret / als da er sagt Roma. viij. Wir
sind schuldener nicht dem fleisch / das wir nach
dem fleisch leben / Denn wo jr nach dem fleische
lebet / so werdet jr sterben.

Zum dritten / Paulus nennet hie funff stück
vnd tugende / Nemlich / Kinder zeugen / den glau-
ben / die lieb / heiligung vnd zucht. In diesen
stückken beschreibet er die rechten wercke vnd ga-
ben / damit ein weibs bilde geziret sein sol / vnd
Gott dienen kan / wollen derhalben ein igliches
in sonderheit fur vns nemen vnd erkleren / wenn
wir die selbigen recht verstehen / so kan man
leichtlich erkennen vnd sehen / wie ein hoher gro-
sser trost es sey / das er sagt / das die weiber durch
diese tugend vnd stercke selig werden.

Glaube heisst gantzliche / hertzliche / trost-
liche

liche zuuersicht in den Herrn Christum / das
durch wir allein vergebung der sünde / vnd die
gerechtigkeit empfangen.

Liebe bedeutet / wie auch an andern ortern
die liebe gegen Gott vnd den nehesten / das ist /
Gottes forcht vnd gehorsam seiner gebot.

Fur andern aber allen die eine fraw auff erden
zu lieben verpflichtet / sol sie iren Man vnd kin-
der lieben sich freuntlich / gutwillig / gehorsam
vnd vnterthenig mit aller ehrerbietung vnd lin-
digkeit gegen irem Man schicken / das sie nicht
mit irer wunderligkeit / eigensinnigkeit / halstar-
rigkeit / vnd widerwillen / zu vneinigheit vnd
zwitteracht vrsach gebe / vnd also den Ehestand
schwer vnd trawrig mache / vnd des Mannes
hertze von sich abwende. Die selbige liebe fasset
auch in sich gedult / das sie iren Man in vnglück
francckheit / armut / fahr / widerwertigkeit vnd
andern nöten nicht verlasse. Zum letzten / das
sie auch milde vnd wolthetig sey / armen brech-
lichen leuten wolthat erzeige vnd zu hulffe ko-
me &c.

Diese tugende sein seer schone herrliche tu-
gende / vnd ein schone zier an weibern / wie das
an Exempeln besser vnd klerlicher zusehen vnd
zuerkennen ist. Die alten vnd der Heiligen
Schrift Exempel von tugensamen weibern
sind gnugsam bekandt / als von Sara vnd an-
dern Gottforchtigen weibern / in welchen vber
andere werck vnd tugend / so sie in Gottes forcht
vnd glauben geübt haben / sonderlich die gedult
die sie

die sie mit iren Mennern in zufallenden nöten
vnd vnglücken gehabt / erfur scheint vnd sie
hoch preiset. Denn sie mit iren verriagten vnd
vertriebenen Mennern ins elende / in frembde
vnbekandte lande gezogen / güter vnd alles verla-
ssen / gros vnglück not vnd trübsal mit inen gelit-
ten haben. Haben daruber sich auch armer / not-
turfftiger Leute mit sonderlicher grosser barm-
hertzigkeit vnd mitleiden angenommen / vnd inen
viel hülff trost vnd furderung gethan. Vnter
dise Frawen mag auch billich erzelet vnd gesetzt
werden / die Furstin / seliger gedechtnis / Elisa-
bet aus Thuringen / eines Vngerischen Königs
tochter. Auch kan vnter solche Frawen erzelet
werden die Schwester des Kaisers Karoli / des
vertriebenen Königs Christierni Elichs gema-
hel / Welche vber andere viele herrliche schone
tugende / sonderlich mit diesen tugenden begabet
war / das sie mit grosser gedult sanfftmüt vnd
lindigkeit ires Ehelichen gemahels wunderlig-
keit vnd gebrechlichkeit duldet / vnd das sie so
grosmutig vnd gedultig alles vnglück elende
vnd not ires vertriebenen Mannes erleiden vnd
tragen helffen / vnd keinerley weise in verlassen
wolte. Sie hat weite ferne reisen mit grosser fahr
vnd beschwerungen gethan / zu allen befreund-
ten vnd verwandten / das sie iren Man wider-
umb ins Reich bringen mochte / Sie aber hat
das Reich / das ir angetragen vnd angeboten
ward / on iren Man nicht haben noch anne-
men wollen. Sie pflag auch ire hohe wehe-
B mut

mut vnd hertzleid in diesem elende auff's fleißigst
zu bergen / vnd jren Man wenn er trawrig/be-
trübt / vnd vngedultig war / mit lieblichen hertz-
lichen schönen tröstsprüchen aus Gottes wort /
vnd wo mit sie nur kondte zu lindern vnd zusrie-
den zustellen. In solchen vnd dergleichen Exem-
peln kan man sehen / was liebe sey.

*Sand für
Cyprian*
Heiligung / heist gemeiniglich Keuscheit an
solchen ortern / da man vom Ehestande handelt /
als .j. Thess. iij. braucht Paulus auch dis wort-
lein / da er sagt / Das ist der wille Gottes Ewre
Heiligung / das jr meidet die hurerey / vnd ein-
iglicher vnter euch wisse sein fass zu behalten in
heiligung vnd ehren / nicht in der lust senche.
Weil er nu vorhin gesagt hat / das eine frau
selig werde durch kinder zeugen / so ist gnugsam
daraus zusehen / das er nicht verbeut die Ehe-
liche pflicht vnd freuntschafft zuleisten / sondern
ehebruch wird dadurch verboten. Ja die leis-
tung der ehelichen freuntschafft vnd liebe / wird
hie hoch gelobt vnd gezieret / damit das er die
eheliche Keuscheit (das ist / messigen zimlichen
gebrauch ehelicher freuntschafft / vnd vermei-
dung des ehebruchs) heiligung nennet.

Vnd dieser Spruch Panli zeigt gnugsam an /
das der Ketzer Tatianus geirret habe / der die
pflicht vnd freuntschafft ehelicher liebe / als vn-
heilig vnd fur sunde achtet vnd verdampfte /
Auff diesen schentlichen irthum des Tatiani ge-
raten auch schier etliche vngelerte grobe gesellen
VON

von vnsern widersachern den Papisten / welche
das vnchristliche vnd Tyrannisch gesetz / darin
den Geistlichen die Ehe verboten ist / verteidin-
gen vnd sagen / das die Priester oder Geistlichen
nicht können eheliche Menner sein / der vrsach
halben / das sie heilig sein sollen / Der Ehestand
aber sey nicht heilig zc.

Solche Argument vnd schlusrede machen
die vnuerstendigen leute / vnd sind in der irrigen
Gottlosen meinung / das der Ehestand nicht ein
heiliger Christlicher stand sey / wider helle / klare
zeugnisse der heiligen Schrift. Zeuget nicht
alhie Paulus klerlich mit ausgedruckten worten
das der gebrauch vnd leistung Ehelicher freunt-
schafft heilig sey? Vnd in der ersten zun Corin-
im. vii. Cap. sagt Er / Der vngleubige Man ist
geheiligt durch ein gleubig Weib / das ist / der
gebrauch ist heilig / zugelassen / vnd Gott gefellig
zc. Wie auch Paphnutius in der versammlung
der Geistlichen zu Nicen / da man handelte vnd
ratschlagete / ob man den Geistlichen die Ehe
verbieten solt / gantz fein / weislich / vnd Christ-
lich gesagt hat / Consuetudinem coniugalem
esse continentiam / das die freuntschafft eheli-
cher lieb vnd pflicht / Keuschheit were.

Wiewol nu dieser gantzer Spruch in allen
worten den Ehestand lobet vnd preiset / idoch ist
sonderlich dis wortlin / Heiligung / fleissig vnd
wol zumercken / Denn mit dem wortlein zeuget
vnd zeigt er klerlich an / das der Ehelich stand

B ij — heilig

Handwritten marginal notes in brown ink:
Abz die he
ze z vn the
Berhd v
C 11 - Zucht

heilig sey / das ist / ein stand vnd ein werck das
von vnd durch Gott geordnet vnd eingesetzt /
auch durch Gottes wort bestetigt vnd appro-
birt sey / vnd Gott wolgefalle. Man sol aber
nicht imaginirn oder gedenccken / das es Gott al-
so wolgefalle / wie er die schwachheit vnd brechli-
keit menschlicher natur duldet / verzeihet vnd zu-
gibt / sondern man sol es dafür halten / das die
freuntschafft vnd leistung ehelicher liebe / ein
werck sey im Ehestand / das Gott geordnet vnd
approbirt habe / wenn gleich etwas menschli-
cher gebrechlichkeit mit vnterlaufft / wie auch
sonst im gantzen leben / Aber dauon werd ich
hernach weiter etwas sagen.

Weil er nu vorhin von den stücken vnd tugenden
welche nicht allein die frawen / sondern auch al-
le andere menschen an sich haben sollen (nemlich
von dem glauben vnd der liebe) geleret hat / so
setzet er bald darnach eine tugend die sonderlich
zum Ehestand gehöret / nemlich / Keuscheit vnd
trew im Ehestand / Vnd dis stück ist sonderlich
zum Ehestand nötig / Denn wenn diese tugend
da nicht ist / so ist der ehestand auffgelöset / vnd ist
kein ehestand nütz mehr. Es hat auch Gott den
ehebruch vnd andere vnzucht vnd schande alzeit
grewlich vnd hart gestraffet / wie das gnugsam
die Historien von der Sintflut / Item des Isra-
helitischen volckes in Israel / Item Davids vnd
viel andere mehr zeugen.

Zucht

Zucht (welches das letzte stück ist) fasset viel tugende in sich / Ich wils in drey fassen / Das erste sol sein messigkeit in essen vnd trincken. Denn es ist ein feindselig / schendtlich / lesterlich ding an einem weibe / wenn sie on masse / vnzuchtig frist / vnd sich voll sauffet. Derhalben haben die vöcker Massilienses vnd die alten Römer den frawen nicht nachgegeben / sondern hart verboten / wein zutrincken. Denn der wein zuviel gedruncken / entzündet fleischliche luste vnd begirde / dazu so machet alle vberflüssigkeit / sonderlich des weins / vnfruchtbare Leute. Derhalben schreibt auch Paulus in der Epistel an Titum / das die frawen nicht sollen weinseuffrinen sein. Augustinus schreibt das seine Mutter also sey erzogen / das jr auch nicht erlaubt sey worden wasser zutrincken / denn allein vber tisch vnterm essen / Als sie aber gefraget ward / aus was ursach die Eltern jr auch das wasser auffer den malzeiten zu trincken verboten hetten / Antwortet sie / Es were derhalben geschehen / das sie nicht / weil sie noch ein jungfraw were / gewonete an wasser offft vnd viel zu trincken / vnd darnach / wenn sie einen Man kriegete vnd ein hausmutter würde / so offft denn auch wein trincken muste / Derhalben das man sie also zur messigkeit vnd nüchterm / ingezogenem leben gewennete / habe man jr auch das wasser verboten auffer der malzeit zu trincken.

Es ist warlich Messigkeit eine notwendige tugend in allen dingen / zu einem Geistlichen

B ij Christ

Christlichen leben / Also das keiner der in vberflus vnd vnmessigkeit lebet / sich ein Christ rümen könne / Wie Paulus sagt / Kein trunckenpolt oder volsenffer wird das reiche Gottes besitzen / Vnd Christus ermanet vns gantz ernstlich vnd fleissig / das wir vns sollen fürsehen / das vnser hertze mit vbrigem fressen vnd sauffen nicht vberladen vnd beschweret werden.

Vber das so bedeutet vnd fasset auch das wortlein / Zucht / in sich / messigkeit / mass vnd zucht in des leibes zierung / in kleidern / im gehende / im redende / vnd dergleichen auswendigen dingen vnd geberden. Denn vberflus oder vnmessig / vnnütz geprenge vnd vnkostung der kleider vnd ander zier des leibes / bringt mit sich viel andere laster / gibt ein böss Exempel / schadet der narung vnd haushaltung / ja oft dem gedeien einer gantzen Stad. Derhalben hat auch S. Paul den vberflus vnd vnkost in solchen dingen hart zuuor in diesem Capitel verboten / Vnd Petrus redet vnd leret auch gar fleissig davon etc. Vmb ergernisse willen zuuerhüten / das niemands kein böss Exempel gegeben müge werden / so sol masse hierin gehalten werden vnd ehe zu wenig / denn zuviel geschehen. Es sollen vnd müssen sich auch Christliche frawen für allen dingen stets vnd allenthalben befleissen / das sie mit guten Exempeln / mit einem feinen zuchtigen erbarn wandel / mit einem messigen nüchtern leben / mit vermeidung aller vnützen

nützen vnmeßigen vnnötigen vnkost/in Kleidung
vnd leibs zier/mit demut vnd andern tugenden
das Euangelion zieren/vnd andere zur Gottse-
ligkeit vnd einem Christlichen leben reitzen.

Das dritte stück/so zur zucht gehöret/ ist das
sie fleissig vnuerdrossen vnd embsig sey in irer
vocation/im haushalten/vnd alle dem / das jr
befolhen ist vnd zuthun/ zustehet/ Das sie sich
nicht menge in frembde hendele die sie nichts
angehen / in sachen die jr nicht befolhen sind/
als in sachen vnd hendele einer stad vnd gemein/
Item das sie nicht ehrgeitzig sey/vnd nach ho-
hen/grossen dingen vnd stendē trachte vnd stehe/
sondern das sie ires hauses trewlich vnd fleissig
warte/Wie auch Paulus hernach sie vermanet/
das sie heuslich sein sollen. Derhalben hat auch
der hochberümpfte Maler Apelles also ein wei-
bes bild gemalet / das sie auff einem schnecken
stund / Damit anzuzeigen / das einer tugentsa-
men Hausfrawen zime / mehr in irem hause
denn draussen zu sein/vnd des fleissig zuwarten/
wie eine Schnecke jr haus mit sich vmbher tra-
get. Vnd zwar wenn sie wollen irem Ampt ge-
nung thun vnd irer vocation trewlich furstehen/
so müssen sie warlich nicht viel ledig vnd spa-
ciern gehen / sondern schwere vnd grosse arbeit
mühe vnd sorge tragen/gar fleissig auffsehen/
vnd an allen ortern die augen haben/ Wenn sie
auch ires hauses sich ernstlich vnd fleissig anne-
men/vnd recht dafur sorgen wollen / so werden
sie ande-

sie anderer nerrischer dinge / der kindischen hof-
fart / des vnnützen / vnnötigen geprengs / wol
drüber vergessen. Es haben warlich die frawen
viel gescheffte vnd wercke / in irem ampt vnd be-
ruff / daran vnd darinnen sie iren glauben vben
können vnd sollen / Denn kinder auffziehen / hat
viel fahr / viel mühe / sorge vnd arbeit / Zum
haushalten gehöret auch auffsehen / fleiß vnd
embfigkeit / fürsichtigkeit / ratsamkeit &c.
Es fellt auch so viel fur / es tragen sich so seltza-
me wunderliche vnfälle zu / das sie sehen vnd erfa-
ren / das Gott müsse mit haushalten / vnd mit
seiner gegenwertigkeit segen vnd hulffe dabey
sein / sonst sey es verloren / vnd lernen damit Gott
also anruffen / hulff vnd rat von im begeren / vnd
in Gottes furchten leben.

S. Peter hat in zweyen stucken oder tugen-
den begrieffen / alles was einer frawen zugeho-
ret / Nemlich / in einem sanfften vnd in einem stil-
len Geiste. Ein sanffter Geist bedeutet liebe /
gehorsam / gedult / lindigkeit / sanfftmüt / freunt-
lichkeit / vernunftigkeit vnd sittigkeit in Worten /
geberden vnd dergleichen. Ein stiller geist ist /
das sie nicht ehergeitzig / nicht hoffertig / nicht
stoltz / nicht hochtraben / nicht nase weise / nicht
surwitzig sey / sich nicht vnterwinde / das jr ni-
cht auffgelegt vnd befolhen ist / sondern das sie
ires ampts vnd befelchs trewlich warte / vnd
das allein mit allem fleiß / embfigkeit / sorg vnd
vnerdrossen ausrichte. Also

Also sehen wir auch/das Paulus an diesem
ort ein rechte feine Christliche Haushaltung ab=
malet/vnd vns fur stellet/in diesen vier stücken/
Glanben/Lieb/Heiligung oder Keuscheit / vnd
Zucht/darin er alle tugent/so einer Frawen zu=
gehoren/aus der massen artig vnd kurtzlich be=
griffen hat.

Zu diesen setzt er das funffte/Kinder zeugen/
welches allein die Weiber betrifft / Vnd dis ist
auch eine schöne hohe tugent vnd zier an einem
Weibe. Es bedeutet aber Kinder zeugen nicht
allein hie/die arbeit vnd schmerzen in der ge=
burt leiden/sondern willig vnd gerne vmb der
ordnung vnd befelch Gottes willen/dem manne
gehorsam vnd vnterthenig sein. Item die sch=
merzen vnd arbeit in Kinder zeugen / sie erne=
ren/vnd auffziehen/ gern vnd gedultig auff sich
nemen vnd tragen.

Weil nu dis stück/ nemlich Kinder zeugen/
vnd ehelicher liebe freuntschafft leisten / wercke
sind/die sonderlich vnd allein zu der Frawen be=
ruff gehoren/von Gott so geordnet/vnd durch
Gottes wort bestettigt/So hat der Apostel Pau=
lus gantz weislich/vnd aus grossen bedencken/
diese stück zu den andern tugenden gesetz/damit
anzuzeigen/das der Ehelichen liebe werck nicht
allein nicht verdammet / vnchristlich / wider
Gott/oder allein ein schwachheit vnd gebrechli=
keit die Gott duldet/wie er die begirden vnd luste
in vns duldet/sondern das es ein rechte tugent
sey. Derhalben/sage ich/setzt ers zu den andern
E tugenden/

*Christiana
oconomia*

Ja allen Cristen

tugenden/vnd preiset es so hoch/das er sagen
dürffe/das eine Fray wie durch andere tugen-
de vnd wercke des gehorsames/also auch durch
diesen gehorsam/vnd dis werck selig werde.

Derhalben ist dis das er sagt/Sie werden se-
lig werden &c. wol zu mercken vnd einzubilden/
das wir wissen vnd schliessen können / nach dem
mal Paulus die seligkeit zusagt den Weibern/
die solch tugent vnd gaben an sich haben/das
solche gaben vnd wercke nicht gebrechlichkeit sey/
sondern tugende vnd wercke die Gott gefallen/
vnd von Gott verordnet vnd geschaffen sind/
als nütze nötige vnd heilige wercke.

Ich habe aber vorhin angezeiget / das die
stücke alle zu hauff an ein ander hengen/vnd das
man nicht ein stück allein/sondern alles zu hauff
nemen/vnd das stück vom Glauben nicht auf-
sen lassen mus/das man dem Glauben nichts
neme/was im zugehöret/vnd den Wercken oder
den andern stücken des gehorsams zuschreibe/
was inen nicht zugehöret.

Nu solt man dagegen halten andere stende
oder wercke/die Gott nicht geboten/vnd solche
herrliche zeugnissen nicht haben. Ich meine die
Monch vnd Nonnen solten ia triumphirn vnd
rhümen/wenn sie so viel zeugnissen vnd hohes
lobs in der Schrift hetten von irem Ehelosen
stande. Denn wie wol die Jungfrawschafft
ire lob hat / wenn man derhalben Jungfraw
oder vnuerehelicht vnd allein bleibet/das man
deste

beste fleißiger vnd besser dem Euangelio dienen
müge / Doch so ist das werck / Kinder zeugen /
ein werck vnd tugent von Gott verordnet / vnd
in die natur gepflantzet / vnd solch ein werck /
das ich gewis kan wissen vnd sagen / das es ein
gut / Gottlich / ehrlich / Christlich / vnd nötig
werck sey / das Gott habe eingesetzt / bestetigt
vnd approbirt. Derhalben ist ein werck da
man Gott mit dienet / das Gott wolgefellet / so
ein rechter Glaube dabey ist / Denn durch die
werck dienet man allein Gott / die gefallen Gott
allein / welche er geordnet / eingesetzt vnd gebotē
hat. Wenn man aber ein Jungfraw bleibt /
das ist / sich nicht verendert oder nicht verehe-
licht / nicht der meinung oder aus der ursach /
das man dem Euangelio diene / sondern das es
an sich selbst ein Gottes dienst sein sol / so sagt
die Schrift also dauon / Sie dienen vnd ehern
mich vergeblich mit menschen gebot.

So halte nu diese zwey zuhauff / das gelubd
der Jungfrawschafft vnd den Ehestand. Pau-
lus sagt vom Ehestande / Sie werden selig wer-
den durch Kinder zeugen / so sie bleiben im glau-
ben zc. Zeigt damit klerlich an / das es ein werck
sey / da man Gott recht mit diene. Von der Mon-
chen vnd Nonnen stand aber sagt die Schrift /
Sie dienen mir vergeblich mit menschen gebot.

Es ist gut vnd nutzlich auch gantz nötig / das
man solchs lob vnd zeugnisse der Schrift vom
E. ii. Ehestand

oder bleibt

Ehestand wol mercke vnd bewege / vnd gegen
dis ertichtete falsch / Gottlos / vnchristlich vnd
nerrisch gelöbte der Noncherey vñ Nonnē stand
vnd eigenerwelete Jungfrawschafft halte vnd
setze / auff das die Eheleute wissen können / das
ir stand ein guter Christlicher Gottlicher stand
sey / das sie in mit gutem gewissen brauchen kön-
nen / vnd das die wercke / die sie im Ehestand
thun / Gotte wolgefallen / vnd rechte Gottes
dienste sein. Es ist viel vnd hoch daran gelegen
in allen hendeln vnd stenden / das man sein ge-
wissen wol versichere vnd vergwisse / das wir
nicht daran zweiffeln / es sey recht vnd Gott ge-
fellig / was wir thun / vnd das wir es mit gutem
gewissen thun // mit dancksagung vnd im glau-
ben / Denn es stehet also geschrieben / Alles was
nicht aus dem glauben ist / das ist sünde. Was
aber nicht mit gutem gewissen geschicht / da
wir an zweiffeln ob es recht sey / vnd Gott gefal-
le oder nicht / das kan nicht im glauben gesche-
hen.

Solchs hab ich kurtzlich von diesem Spruch
Pauli sagen wollen / das frome vnd Christliche
hertzen in deste besser verstehen vnd inen einbil-
den mochten / vnd sich nicht durch andere heuch-
lische werck verführen lassen / Denn es haben die
heuchley / vberglaube / vnd die Gottes dienste /
die Gott nicht geboten hat / vnd die selbest er-
welete werck einen grossen schein vnd ansehen /
wo man sie nicht gegen Gottes wort helt / vnd
kan leichtlich ein hertz / das in Gottes wort
nicht

nicht wol gegründet ist / betrogen vnd verführet
werden. Derhalben mus man sich mit diesem
vnd dergleichen Sprüchen vnd zeugnissen wie
der sie zurüsten vnd zubefestigen.

Etliche feine Sprüch von den Frawen / aus heiliger Schrift.

Im Ersten buch Mose am. ij. Vnd Gott
der Herr sprach / Es ist nicht gut / das der men-
sch allein sey / ich wil im ein gehülffen machen /
die sich zu im halte etc. Da lies Gott der Herr
einen tieffen schlaff fallen auff den menschen /
vnd er entschlief. Vnd nam seiner Rieben eine
vnd schlos die stet zu mit fleisch / Vnd Gott der
Herr bauet ein Weib aus der Riebe / die er von
dem menschen nam / vnd bracht sie zu im / Da
sprach der mensch / Das ist doch bein von mei-
nen beinen / vnd fleisch von meinem fleisch / Man
wird sie Wennin heissen / darumb das sie vom
Manne genomen ist. Darumb wird ein Man
seinen Vater vnd seine Mutter verlassen / vnd an
seinem Weibe hangen / vnd sie werden sein ein
fleisch etc.

Genesis am. ij. Vnd zum Weib sprach Er /
Ich wil dir viel schmerzen schaffen / wenn du
schwanger wirst / Du solt mit schmerzen kinder
geben / vnd dein will sol deinem Man vnter-
worffen sein / vnd er sol dein Herr sein.

Leuitici. xx. Wer die ehe bricht mit jemandes
Weibe / der sol des tods sterben / beide Ehebre-
cher

cher vnd Ehebrecherin / Darumb das er mit sei-
nes nehesten weibe die ehe gebrochen hat / Vnd
mehr im gantzen Capitel.

Deutro . am. xxij. Ein Weib sol nicht mans
gerete tragen / vnd ein Man sol nicht Weiber
Kleider anthun / Denn wer solchs thut / der ist
dem Herrn deinem Gott ein grewel etc.

Spruch. Salomo . am. ij. Wo die weisheit
dir zu hertzen gehet / das du gerne lernest / so wird
dich guter Rat bewaren / vnd verstand wird dich
behüten etc. das du nicht geratest an eines an-
dern weib / vnd die nicht dein ist / die glate wort
gibt / vnd verlest den Herrn irer jugent / vnd ver-
gisset den Bund ires Gottes. Denn jr haus nei-
get sich zum tod / vnd ire genge zu den verlornen.
Alle die zu jr eingehen / komen nicht wider vnd
ergreifen den weg des lebens nicht.

Spruch. Salo. am. v. Cap. Mein kind merck
meine weisheit / neige deine ohrē zu meiner lere /
Das du behaltest guten Rat vnd dein mund wisse
se vnterscheid zu haben. Denn die lippen der hu-
ren sind ein honigseim vnd jr kele ist glater denn
öle / Aber hernach bitter wie wermut / vnd scharff
wie ein zweyschneitig schwert / Ire füsse lauffen
zum tod hinunter / ire genge erlangen die Dell.
Sie gehet nicht stracks auff dem wege des le-
bens / vnstete sind ire tritt / das sie nicht weis / wo
sie gehet.

Vnd bald hernach.

Dein born sey gesegnet / vnd frewe dich des
weibs

*ist her am...
pope
lectione*

*ist ist...
wider die
man könne sich
dafür nicht halten
wo man sich
mit...
wort...
verwahrt*

De gung. her
weibs deiner jugent. Sie ist lieblich wie eine
Ninde/ vnd holtſelig wie ein Rehe/ las dich ire
liebe allezeit ſettigen/ vnd ergetze dich allewege
in irer liebe. Mein kind warumb wiltu dich an
frembden ergetzen / vnd hertzeſt dich mit einer
andern etc.

Spruch Salomo. am. vi. Mein kind / Beware
die Gebot deines Vaters / vnd las nicht ſaren
das Geſetz deiner Mutter etc. Auff das du be-
waret werdeſt für dem böſen Weibe / für der glat-
ten zungen der frembden. Las dich ire ſchöne ma-
cht gelüſten in deinem hertzen / vnd verſahedich
nicht an iren augenlieden / Denn ein Dure nimpt
ein ſtück brods / Aber ein Eheweib ſehet das edle
leben / Kan auch jemand ein feur im boſem be-
halten / das ſeine kleider nicht brennen. Wie ſolt
jemand auff kolen gehen / das ſeine füſſe nicht
verbrand würden. Also gehets / wer zu ſeines ne-
heſten weib gehet / Es bleibt keiner vngestrafft
der ſie berüret etc.

Spruch Salomo. am. vii. Sprich zur weis-
heit / du biſt meine Schweſter / vnd nenne die
flugheit deine freundin / das du behüt werdeſt /
für dem frembden Weibe / für einer andern die
glatte wort gibt. Denn am fenſter meines hau-
ſes / kucktet ich durchs gegitter / vnd ſah vnter
die albern / Vnd ward gewar vnter den kindern
eines nerriffchen Jünglings / der ging auff der
gassen an einer ecken / vnd trat daher auff dem
wege an irem hauſe / in der demmerüg am abend
des tages / da es nacht ward vnd tuncel war /
Vnd

*Itēy fero
admonet vt
1595 f. b. rancie
portatione*

Vnd sihe / da begegnet im ein Weib im Durns
schmuck / listig / wild vnd vnwendig / das ire füsse
in irem hause nicht bleiben können / Itzt ist sie
haussen / itzt auff der gassen / vnd lauret an allen
ecken / Vnd erwischt in / vnd küisset in vnuersch-
ampt / vnd sprach zu im / Ich habe danckopffer
fur mich heut bezalet / fur meine gelübde / Dar-
umb bin ich eraus gegangen / dir zu begegnen /
dein angesicht frue zu suchen / vnd hab dich funden.
Ich hab mein Bette schön geschmückt / mit
bundten Teppichen aus Egypten / Ich hab
mein lager mit Myrren / Aloes / vnd Cinnamen
besprenget. Kom / las vns genug bulen bis an
den morgen / vnd las vns der liebe pflegen / Denn
der Man ist nicht daheime / Er ist einen fernen
weg gezogen / Er hat den geltsack mit sich geno-
men / Er wird erst auff's fest wider heimkomen.
Sie vberredet in mit vielen worten / vnd gewan
in ein mit irem glaten mund / Er folget ir bald
nach / wie ein Ochse zur fleischbanck gefurt
wird / vnd wie zum fessel da man die Narren
züchtiget / Bis sie in mit dem pfeil die lebbern
spaltet / Wie ein vogel zum strick eilet / vnd weis
nicht das in das leben gilt / So gehorchet mir
nu / meine kinder / vnd mercket auff die rede mei-
nes munds / Las dein hertz nicht weichen auff
iren weg / vnd las dich nicht verführen auff irer
ban / Denn sie hat viel verwund vnd gefellet /
vnd sind allerley mechtigen von ir erwürget. Ir
haus sind wege zur Dellen / da man hinunter
feret in des todes kamer. Spruch

*Wer da hat ein bose ehefrau...
Der hat
selben gut
gawollgemacht*

Spruch Salom. am. ix. Es ist aber ein tö-
richt/vnrugig Weib/vol schwetzens/vnd weis
nichts.

Daselbst am. xj. Das ist ein holtselig Weib/
das die ehre erhelt/Aber das sind drey stücken/
die den reichthum erhalten.

Vnd hernach.

Ein schön Weib on zucht / ist wie ein Saw
mit einer gülden spangen auff der nasen.

Item am. xij. Ein fleissig Weib ist eine Kron
ires Mannes/Aber ein vnfleissige/ist ein ester in
seinem gebeine.

Am. xiiij. Durch weise weiber wird das haus
erbarwet / eine Herrin aber zubrichts mit irem
thun.

Am. xvij. Wer ein Ehefrau findet / der findet
was guts / vnd schepfft segen vom Herrn.

Am. xix. Ein herrischer Son ist seines Vaters
hertzenleid / vnd ein zenckisch weib ein stettiges
triessen / Haus vnd güter erben die Eltern / Aber
ein vernunfftig weib kompt vom Herrn.

Am. xxi. Es ist besser wonen im wüsten Lan-
de / denn bey einem zenckischen vnd zornigen
weibe.

Am. xxv. Es ist besser im winckel auff dem
dach sitzen / Denn bey einem zenckischen weibe
in einem hause.

Am. xxvij. Ein zenckisch weib vnd stettigs
triessen wenns seer regent / werden wol mit ein-
ander vergleicht / Wer sie auff helt / der helt den
wind / vnd wil das ole mit der hand fassen.

*Ein freumer man...
Ja du bey leben...
Das müß...
D* Am. xxx.

Alm. xxx. Drey sind mir zu wunderlich / vnd
das vierde weis ich nicht / Des Adlers weg im
Himmel / Der Schlangen weg auff einem felsen /
Des Schiffes weg mitten im Meer / vnd eins
mans weg zu einer magd. Also ist auch der weg
der Ehebrecherin / die verschlingt vnd wisscht ir
maul vnd spricht / Ich habe kein vbel gethan.

Si. v. 6. Gut fürpe
Wenn ein tugt für was besetzt ist die
Alm. xxxj. Wer wil ein redlich weib finden? sie
ist edler denn perlen / Irs mans hertz thar sich
auff sie verlassen / vnd narung wird im nicht
mangeln / Sie thut im guts vnd kein böses ir le-
ben lang / Sie gehet mit wolle vnd flachs vmb /
vnd erbeitet gerne mit iren henden / Sie ist wie
ein Kauffmans schiff / das seine narung von fer-
ne bringet / Sie stehet des nachts auff vnd gibt
futter irem hause / vnd essen iren dirnen. Sie den-
cket nach ein acker vnd kufft in / vnd pflantzet
einen weinberg von den fruchten irer hende / Sie
gürtet ire lenden fest / vnd sterckt ire arme / Sie
Werkot fület das ir handel gut ist / Ir leuchte verlescht
des nachts nicht / Sie strecket ire hand nach dem
rocken / vnd ire finger fassen die spindel / Sie brei-
tet ire hende aus zu dem armen / vnd reichet ire
hand dem dürfftigen / Sie fürcht ires hauses ni-
cht für dem schnee / denn ir gantzes hauss hat
zwei fache zweierley Kleider / Sie macht ir ein schmuck / wei-
sse seiden vnd purpur ist ir Kleid / Ir man ist be-
rühmet in den thoren / wenn er sitzet bey den El-
testen des lands / Sie macht ein rock vnd ver-
kufft in / Einen gürtel gibt sie dem Kremer.

Estk. Jesus

Jesus Syrach am. vii. Scheide dich nicht
von einer vernunfftigen vnd fromen frawen/
Denn sie ist edler weder kein gold.

Syrach am. ix. Lauer nicht vber dein fromes
weib/ Denn solch hart auffsehen bringt nichts
guts/ Das dem weib nicht gewalt vber dich/ das
sie nicht dein herr werde &c.

Am. xxiij. Ein Man der seine ehe bricht / vnd
gedenckt bey sich selbs/ Wer sibet mich? Es ist
finster vmb mich/ vnd die wende verbergen mich
das mich niemand sibet / Wen sol ich schewen?
der aller hohest achtet meiner sunde nicht/ Sol-
cher schewet allein der menschen augen/ vnd ge-
denckt nicht das die augen des Herrn viel heller
sind denn die Sonne/ vnd sehen alles was die
menschen thun/ vnd schawen auch in die heim-
lichen winckel/ Alle ding sind im bekand/ ehe sie
geschaffen werden/ also wol als wenn sie gescha-
ffen sind/ Der selb man/ wird offentlich in der
stad gestraffet werden / vnd wird erhascht wer-
den/ wenn er sichs am wenigsten versihet. Also
wirds auch gehn dem weibe/ die iren man ver-
lest/ vnd einen erben von einem andern kriegt/
Erstlich ist sie dem gebot Gottes vnghehorsam/
Zum andern sundiget sie wider iren man/ Zum
dritten bringt sie durch iren ehebruch/ Kinder
von einem andern/ Diese wird man aus der Ge-
meine werffen/ vnd ire Kinder müssen jr entgelten
Ire Kinder werden nicht wurtzeln/ vnd ire zwei-
ge werden nicht frucht bringen/ Sie lest ein ver-
flucht gedechtnis hinder sich / vnd ire schande
D ij wird

Des lebeter noch ernst so lange

wird nimer mehr vertilget / Daran lernen die nachkomen / das nichts bessers sey denn Gott furchten / vnd nichts süßers denn auff Gottes gebot achten.

Am. xxvj. Wol dem der ein vernunfftigs weib hat *zc.* Es ist kein list vber frawen list *zc.* Es ist kein kopff so listig als der Schlangen kopff / vnd kein zorn so bitter als der frawen zorn / Ich wolt lieber bey lewen vnd drachen wonen / denn bey einem bösen weibe / Wenn sie böß wird / so verstelltet sie jr geberde / vñ wird so scheuslich wie ein sack / Ir man mus sich jr schemen / vnd wenn mans jm furwirfft / so thuts jm im hertzen wehe / Alle bosheit ist geringe / gegen der weiber bosheit / Es geschehe jr / was den Gottlosen geschicht. Ein weschafftig weib ist einem stillen man / wie ein sandiger weg hinauff einem alten man / Las dich nicht betriegen / das sie schöne ist / vnd beger jr nicht darumb / Wenn das weib den man reich macht / so ist da eitel hadder / verachtung vnd grosse schmach / Ein böses weib macht ein betrübt hertz / trawrig angesicht / vnd das hertzeleid / Ein weib da der man kein freud an hat / die macht in verdrossen zu allen dingen / Die sund kompt her von einem weibe / vnd vmb jrer willen müssen wir alle sterben / wie man dem wasser nicht raum lassen sol / also sol man dem weibe seinen willen nicht lassen / wil sie dir nicht zur hand gehen / so scheide dich von jr *zc.*

1. Corint. vij. Von dem jr mir aber geschrieben habt / antwort ich / Es ist dem menschen gut /
das er

Das er kein weib berhöre / Aber vmb der hurerey
willen / hab ein iglicher sein eigen weib / vnd ein
igliche hab jren eigen man / der man leiste dem
weibe die schuldige wilfart / des selbigen gleich-
en / das weib dem manne / das weib ist jres leibs
nicht mechtig / sondern der man / deselben glei-
chen der man ist seines leibs nicht mechtig / son-
dern das weib / Verkürtzt euch nicht vntereinan-
der / es sey denn aus beider bewilligung / ein zeit
lang / das jr euch zum fasten vnd beten müßiget /
vnd kompt widderumb zusammen / auff das euch
der Teuffel nicht versuche vmb ewer vnkeuscheit
willen.

i. Corint. xi. Ein iglicher man der da betet od-
der weissaget / vnd hat was auff dem heubt / der
schendet sein heubt / Ein weib aber das da betet
oder weissaget mit vnbedecktem heubt / die sch-
endet jr heubt / denn es ist eben so viel als were
sie beschorn / wil sie sich nicht bedecken / so schnei-
de man jr das har ab. Nu es aber vbel stehet /
das ein weib verschnitten har habe / oder bescho-
ren sey / so last sie das heubt bedecken. Der man
aber sol das heubt nicht bedecken / sintemal er ist
Gottes bild vnd herrligkeit / das weib aber ist
ein ehre des mannes / denn der man ist nicht von
dem weibe / sondern das weib ist von dem man /
Vnd der man ist nicht geschaffen vmb des weibs
willen / sondern das weib vmb des mannes wil-
len 2c.

i. Corint. xiiij. Ewer weiber last schweigen
vnter der gemeine / denn es sol in nicht zugelassen

D iij wer

werden das sie reden / sondern vnterthan sein /
wie auch das Gesetze sagt / Wollen sie aber etz
was lernen / so last sie daheim ire menner fragen.
Es stehet den weibern vbel an / vnter der Ge-
meine reden etc.

*Et her
obmitt
postul*
Ephesios. v. Die weiber seien vnterthan iren
mennern / als dem Herrn / denn der Man ist des
Weibes heubt / gleich wie auch Christus das
heubt ist der Gemeine / vnd er ist seines leibes
Heiland. Aber wie nu die Gemeine ist Christo
vnterthan / also auch die Weiber iren Mennern
in allen dingen.

Coloss. ij. Ir Weiber seid vnterthan ewern
Mennern / wie sichs gebürt in dem Herrn.

Zielerheben
*Der nebst sein
Licht*
i. Timoth. ij. Desselben gleichen die Weiber /
das sie in zeitlichen Kleidern / mit scham vnd
zucht sich schmücken / nicht mit zöpffen oder
golt / oder perlen / oder köstlichem gewand / son-
dern das wolanstehet den Weibern / die da Gott
seligkeit beweisen durch gute werck / Ein weib
lerne in der stille mit aller vnterthenigkeit.
Einem weibe aber gestatte ich nicht / das sie les-
re / auch nicht / das sie des Mans herre sey / son-
dern stille sey / Denn Adam ist am ersten ge-
macht / darnach Deua / vnd Adam ward nicht
verfüret / das weib aber ward verfüret / vnd hat
die vbertrettung eingefüret / Sie aber wird selig
werden / durch kinder geben / so sie bleibt im
glauben vnd in der liebe / vnd in der heiligung
samt der zucht.

*Die sünde kom
abger. von einem
weibe in vnt
erz willen mit
den alle
von Gvach*
i. Timo. ij. Desselben gleichen ire weiber sol-
len

ten redlich sein / nicht lesterinne / nüchtern / trew
in allen dingen.

i. Pet. iij. Desselben gleichen die Weiber sol-
len iren Männern vnterthan sein / Auff das auch
die / so nicht glauben an das Wort / durch der
Weiber wandel / on wort gewonnen werden /
wenn sie ansehen ewrn Menschen wandel / in der
furcht / welcher geschmuck sol nicht auswendig
sein / mit harsflechten vnd gold umbhengen / oder
Kleider anlegen / sondern der verborgen mensch
des hertzen vnverruckt / mit sanfftem vnd stil-
lem geiste / das ist köstlich für Gott. Denn also
haben sich auch vorzeiten die heiligen Weiber
geschmücket / die ire hoffnung auff Gott satz-
ten / vnd iren Männern vnterthan waren / Wie
die Sara Abraham gehorsam war / vnd hies
in Herr / Welcher töchter jr worden seid / so jr
wol thut / vnd nicht so schüchter seid.

fuhr einigen

*et her
adherenda*

Von auch mit fürcht

Correctur.

Am ersten blat auff der andern seitten / in der .xij.
zeil lese also / Item / was jr ampt vnd pflicht
sey / wie sie sich allenthalben schicken vnd halten
sol / Es hat aber der .2c.

Es ist aber ein Samstuz geist Nichts anders
Liedt: Gehorsam in demt, gelindigk: Samstuz
Freundliche: Verminstigt: Gütlich: was
gehorden von den Engelen
Aber ein stiller geist ist das die Chripen
Weder: nicht sein sollen
Chripen: nicht Goffertig: Nicht stolz
Nicht hochtrabend: Nicht ragen über
Nicht: mitterweg oder furchtlosig
Das ist: Vaterwinden: Es ist mit der
Dank: geliebt ist Gondern: Es ist die
Lust: in Gofelt: reulich: was die
Allem: mit allem Fleis: empfindet sie
Und: innerdruffen: Anbacht

153998

X 202/26

No 1005

147
112







129 #

Der spruch s. Pau- li .i. Timoth. ij.

Sie wird selig durch Kinder zeugen / so sie bleibet
im glauben / in der liebe vnd in der heiligung
samt der zucht. Ausgelegt durch.

D. Casper Creutziger.

Gantz tröstlich vnd nützlich allen Christ-
lichen Tugentsamen frauen zulesen
vnd wissen.

gedruckt zu Berlin bey Hans
Weiss. M. D. C. XXI.

